

Transkription von Urkunde SDL 1387a

Ort, Datierung: Stendal, 1387-11-12

Signatur: Stadtarchiv Hansestadt Stendal, U1, 138

Inhalt: Gilden der Stadt Stendal: Eintracht der Gilden

Jn nomine domini amen wy Gherwere Schomakere bekkere burenmakere korsewrechtere / vn(de) lakenmakere yn vnse heren stad to stendal synt eyndrachtych ghe worden dorch ere / wylle vnde dorch vromes wylle der gantzen stad ofte ennych ynual queme dat were buten edder bynnen / scolde wy dar enneghen nod v(m)me lyden dat wylle wý met eyndrachtycheyt vt draghen vnde wy wyllen den / Ratmannen nene ede mer don wen der stad beste vnde der gulde beste alzo vnse bryue vt wysen ok wylle wy / nenen wylkore mer ghe setted hebben ouer vns wen eyn stad recht ys wy don dat met eyndracht der gulden / Vortmer synt wort ghe vallen vor den guldemeysteren ghemeyne me dorfte franke bodekers reyse nycht mer / maken vnde scolde ennych kryeth vp stan so wolde he dat de scheghe yn syne(n) iunghe(n) yaren de wýle dat he / syne knoken reghen muchte dorch der wort wylle gynghen de guldemeystere yn enen Rat vnde vruchten / sek dat de daet scolde volghen nach den worden ofte me ymande vor weldeghen wolde dorch hates wylle / den wylle wý be hulpen wesen met lyue vnde met gude alzo verne alzo syn recht wendet yn vser enynghe / ok ofte manket dessen meysteren ymant were de syk vor sproke met worden vnde dede¹ dat den meynen gulden to / gude vnde to vrome vnde der meynen stad den wylle wy nycht vt vns gheuen wy wyllen en vor dedynghen / synes rechtes hyr vp scal syk nemant vor laten he scal don alzo vele alzo recht ys desse vor benomeden stukke / loue wy stede vnde² de hyr vor bescreuen stan loue wy stede vnde vaste to holdende alzo bedderue lude yn truwen / vnde yn eren Ghe screuen na godes bort dusent yar dry hondert yar yn den souene vnde achteghen / yare yn sunte liuinus daghe des hylghen merteleres amen

¹ *dede* von gleicher Hand über der Zeile eingefügt

² von *loue* bis *vnde* durchgestrichen